

Noticia
Transparente
di Gobierno

ISLA ONLINE

Diaranson 25 September 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



PROME MINISTER HUNTO CU SVB/AZV A REUNI CU ORGANISACION DI PENSIONADONAN PUBLICO ARUBANO

"Pa Gobierno, OPPA ta un partner importante, y p'esey lo sigui den dialogo cu nan pa asina sigura cu nan ta haya oido di instancianan pa yega na solucionnan"



Diaranson mainta Prome Minister Evelyn Wever-Croes a tene un reunion cu e Organizacion di Pensionadonan Publico Arubano (OPPA), hunto cu AZV y SVB pa atende un carta cu a wordo manda door di OPPA na Gobierno pa cu e preocupacionnan cu nan tin. E preocupacionnan ta entre otro: nan entrada; poder di compra; suma di pensioen; impuesto; e cuido di salud mirando cu e lista di espera pa dokter tin biaha ta hopi largo.

Basa riba e carta aki, Prome Minister a invita nan pa un reunion hunto cu señor Jacobs di SVB/AZV. E reunion tabata uno hopi positivo, na unda OPPA por a trece dilanti e testimonio di varios di nan miembronan cu en berdad ta hopi preocupante, mirando cu e lista pa nan por yega un especialista ta demasiado largo.

Señor Jacobs a indica cu AZV na e momento aki tin un situacion financiero positivo, sinembargo e specialistanan no ta facil pa haya. Di otro banda señor Jacobs a indica cu ora AZV puntra ta wordo bisa cu no tin lista di espera.

Prome Minister a indica, cu mirando cu tin dos version diferente pa loke ta trata cuido medico di nos pensionadonan, SVB/AZV lo bay sinta regularmente cu OPPA na mesa pa asina e



preocupacionnan di e miembronan di OPPA por haya atencion di biaha. Esaki sigur ta un bon paso, pa asina yuda e grandinan drecha nan calidad di cuido.

Durante e reunion tambe a toca e tema di impuesto. E directora di Impuesto a reuni varios biaha cu OPPA y a duna e workshopnan necesario. Awor ta haci seguimiento riba e palabracionnan cu a wordo haci. Sigur hopi bon pa tende cu akinan tin un relacion di trabou cu ta funciona, mirando cu OPPA a indica di ya caba ta mira un cambio den e trato cu DIMP ta duna na e pensionadonan.

"Na fin di dia, e preocupacionnan cu OPPA a trece dilanti ta loke nan ta tende di nan miembronan, y ta preocupacion cu ta biba den nos comunidad cu mester atencion. Mi ta aprecia cu un organizacion manera OPPA, cu ta consisti di pensioenadonan mes ta asisti nos grandinan. Esaki sigur ta e miho forma pasobra nan ta compronde e problematica pasobra nan mes ta bib'e. Mi ta hopi orguyoso di nan pa nan esfuerso y dedicacion den defende nos grandinan. P'esey pa Gobierno, OPPA ta un partner importante, y lo sigui den dialogo cu nan pa asina sigura cu nan ta haya oido di instancianan pa asina yega na solucionnan", Prome Minister a expresa. ■■■

Prome Minister Evelyn Wever-Croes: Durante Summit of the Future

PROME MINISTER A YEGA NA PALABRACIONNAN CONCRETO Y IMPORTANTE PA ARUBA



Prome Minister Evelyn Wever-Croes recientemente a representa Aruba y Reino Hulandes na e Summit of the Future na Nacionnan Uni na New York. Esaki ta un cumbre unda lidernan di mundo ta bin hunto y tuma desicionnan clave cu ta importante pa futuro di cada pais.

Reunion General

Prome Minister tawatin e honor di hiba palabra durante e reunion general den e General Assembly Hall y tambe a atende varios encuentro y conferencia dirigi riba futuro. Durante e Summit of the Future e mandatario di Aruba a trece padilanti preocupacionnan y retonan cu Aruba como pais ta mira pa futuro, manera costo di bida halto, problemanan social y e efectonan di e cambio climatico.

Posicion di hende muhe y mucha muhe

Un di e puntonan importante cu e mandatario a enfoca riba dj'e tawata e posicion di hende muhe y mucha muhe y kico tur tin di haci pa hende muhe y mucha muhe tin oportunidad igual cu e hende homber. "No por bisa cu bo pais ta den desaroyo y ta progresando si tin un grupo den bo comunidad cu no ta progresando mescos cu otro", Prome Minister a subraya.

Encuentro cu hobennan

Otro encuentro tawata cu hobennan unda a enfoca riba derechonan humano, oportunidad igual y e responsabilidad di adultonan pa proteha e planeta. Hobennan ta demanda e gobernantenan pa cuida e mundo pa asina por entrega esaki na e futuro generacion den bon estado of hasta miho ainda cu e ta na e momento aki.

E-Government

Prome Minister tambe a elabora durante un encuentro riba e tema di digitalisacion y Inteligencia Artificial. Un tema



importante pa Aruba cu ta aplicando esaki caba den e proyecto di E-Government, unda ta trahando pa digitalisa procesonan di Gobierno y mehora e servicio. E mandatario ta menciona cu por medio di esaki procesonan actual di oficinanan di Gobierno lo por wordo haci desde e comodidad di cas na un computer. Pero lo sigui tene cuenta cu personanan cu no tin acceso na un computer, wordo atendi na un oficina di gobierno den nan bario.

"Tawata un honor grandi pa un biaha mas representa Aruba riba tarima internacional, Aruba ta goza di un respet enorme. Mi tin 7 aña ta haciendo e trabou aki y por mira cu despues di e 7 añanan aki di trabou intensivo, di crea relacionnan cu e diferente agencianan di Nacionnan Uni, cu Secretario General di Nacionnan Uni señor Antonio Guterres, cu diferente presidente y prome ministernan di diferente pais, e network aki a duna fruto y ta di gran ayuda pa Aruba. Por a logra palabracionnan concreto y importante pa Aruba por sigui haya ayuda pa asina por mehora e calidad di bida di cada ciudadano di nos pais. Y esey ta un logro hopi importante", Prome Minister a expresa.

Prome Minister Evelyn Wever-Croes: Celebrando "SDG Flag Day" hunto cu hobennan

PROME MINISTER A MUSTRA SU COMPROMISO CU METANAN DI DESAROYO SOSTENIBEL HISANDO E BANDERA CU TA REPRESENTA E 17 METANAN



Dia 25 di September ta e dia mundialmente reconoci como SDG Flag Day. Dia cu ta hisa e bandera di e Metanan di Desarojo Sostenibel, Sustainable Development Goals. Prome Minister Evelyn Wever-Croes riba e mainta aki tawata acompaña pa un grupo di hoben unda cu el a dirigi su mes na nan dunando un splicacion di e importancia di e dia aki y despues di e discurso cortico a bay over na e hisamento di e bandera unda por observa e metanan (SDGs).

E Metanan di Desarojo Sostenibel, tambe conoci como e Metanan Global, a wordo adopta pa Nacionnan Uni na aña 2015 como un yamada universal pa accion pa caba cu pobreza, proteha e planeta y percura cu pa na aña 2030 tur hende lo disfruta di paz y prosperidad.

Ta trata di 17 meta (SDGs) cu ta integra, y ta reconoce cu accion den un area lo afecta e resultado den otro, y cu desarojo mester balansa sostenibilidad social y ambiental. Paisnan a compromete nan mes pa duna prioridad na progreso pa esnan cu tin mas necesidad. E SDGs ta diseña pa caba cu pobreza, hamber, AIDS y discriminacion contra hende muhe y mucha muhe. E creatividad, conocimiento, tecnologia y recursonan financiero di henter sociedad ta necesario pa logra e SDGs den tur contexto.

Prome Minister a indica cu den pasado Nacionnan Uni tawata enfoca mas riba paz pero a ripara cu no por yega na paz sin prosperidad. Mester trece paz y prosperidad pa tur humano y pa e planeta, paso si no tene cuenta cu e planeta lo no tin luga pa e futuro generacion por biba.

Di e 17 metanan, porta tin algun meta cu no tur hende lo identifica nan mes cu ne pero si un meta en comun ta pa elimina pobreza riba mundo y cu tur hende tin derecho riba awa potabel, y asina tur e metanan tin nan importancia.



"Aruba ta un pionero den esaki. Mi a caba di bin di un cumbre na Nacionnan Uni unda Aruba a haya hopi elogio pa tur loke ta wordo haci aki unda tambe ta envolve nos hobennan. Danki na tur hoben presente, danki pa e trabou cu boso ta haci di laga boso bos resona pa asina adultonan por tene cuenta cu loke ta importante pa boso. Sigui ta bo mes, sigui resona bo bos y mustra cu ta nos mester haci di Aruba un pais prospero pa boso sigui biba den dje", Prome Minister a expresa. ■



MINISTER URSELL ARENDS TA INVITA COMUNIDAD PA PARTICIPA NA E CONSULTA PUBLICO RIBA E CONCEPTO DI LEY PA BIENESTAR DI ANIMAL

Den cuadro di e vision pa mehora e bienestar di nos animalnan na Aruba, Ministerio di Transporte, Integridad, Naturalesa y Asuntonan di Adulto Mayor ta trahando ariba e ley nobo "Landsverordering Dierenwelzijn". E ley aki tin como meta pa sigura e bienestar y cuida pa nos animalnan domestico.

Desde algun siman a sinta cu diferente stakeholders pa asina ricibi feedback y comentario ariba e contenido di e concepto di ley aki. A sinta cu entre otro veterinarianan, Centro Control di Cacho, DLVV, diferente fundacionnan y otro stakeholders cu ta aporta den e area aki. A ricibi hopi bon comentario ariba e concepto di ley y awo ta den e fase di consulta publico.

Consulta publico a habri desde 18 di september y ta continua te cu 28 di september 2024. Cada ciudadano por comparti nan punto di bista y sugerencianan riba e concepto di ley aki.

Con pa participa na consulta publico?

1. Online via www.publico.aw/consulta caminda por download e concepto di ley y su "memorie van toelichting" y click ariba e formulario digital pa asina yena esaki online.
2. Participa na e consulta publico cu lo tuma luga diahuebs awo dia 26 di september na MFA paradera cuminsando for di 6pm te cu 7pm.

E ta importante pa ricibi comentario di ciudadanonan riba e concepto di ley aki, mirando cu e ta bay tin efecto ariba henter e comunidad. E ta bay rekeri cambionan den pensamiento y mas importante cambionan den comportacion di ciudadanonan.

Minister Ursell Arends ta keda boga pa mehora e bienestar di nos animalnan na Aruba y un di e pasonan grandi den e direccion aki ta e ley pa bienestar di animal. Ademá participacion activo



di comunidad den ley y maneho ta contribui na un sistema mas transparente y sigur. Ta gradici tur esnan cu a participa y contribui na proceso aki.

Invitacion ta bay na comunidad henter pa participa na e consulta publico cu ta tuma luga dia 26 di September 2024, di 6'or di atardi pa 7'or di anochi na MFA Paradera, y asina por comparti puntonan di bista ariba e concepto di ley aki. ■■■

SESION VIRTUAL RIBA OPORTUNIDADNAN NA WASHINGTON DC

Dialuna, 30 september, Minister Plenipotenciario na Merca, sra. Zulema Dabian-Erasmus lo tene un sesion virtual pa un y tur interesa den oportunidadnan na Washington DC pa por enrikese nan carera profesional. E sesion virtual aki lo tuma lugar 9.00 a.m. EST pa asina duna posibilidad pa studiantenan na Hulanda join tambe. Mirando e diferencia di tempo, esaki lo ta 3.00 pm pa studiantenan na Hulanda. Pa por participa mester solamente registra pa haya e zoomlink.

E sesion virtual ta brinda informacion valioso pa studiantenan na Merca, Aruba, Hulanda cu kier haya experiencia di trabow na Washington DC pa asina haci nan Curiculo mas atractivo pa ora di busca trabow. E sesion aki tambe ta interesante pa profesionalnan na Aruba cu kier un cambio den nan carera y ta interesa pa scucha oportunidadnan di trabow na organizacionnan internacional.

Durante e sesion virtual lo tin presentacion di Worldbank y Inter-Amecian Development Bank pa splica riba e asina yama 'internships' cu ta e manera pa drenta den e organizacionnan aki como profesional of recién gradua. Netherlands-America Foundation lo duna un presentacion di fondonan cu tey pa studiantenan di nacionalidad Hulandes pa haci un Master's degree na Merca y/of haci un Internship na Merca, incluyendo nan conocido DC Summer Internships. E profesional Arubiano na Organization of American States, Jennifer Molina Vrolijk, lo termina e sesion contando di su experiencia di internship na Washington DC despues di a gradua na Hulanda.

Por registra ainda pa e sesion virtual, Opportunities in DC, dor di manda un email pa was-gma@minbuza.nl of dor di registra via e link aki: Opportunities in DC

Minister Plenipotenciario como e representante di Aruba na Merca, ta sostene Aruba y identifica oportunidadnan pa Aruba riba tur area. E ta traha na Embahada di Reino na Washington DC. Un di su tareanan ta e capacitacion di hobennan. Merca



ainda ta sinti como un pais caro pa studia y dificil pa stage. Sin embargo cu e informacion correcto kier muestra cu no mester ta asina. Ademá pa profesionalnan cu kier enrikese nan carera tin diferente oportunidad. Paisnan normalmente ta purba stimula presencia di nan profesionalnan den organizacionnan internacional, pasobra esakinan ta esunnan cu ta identifica oportunidadnan pa e desaroyo di nan pais.

Den pasado Minister Plenipotenciario a organiza un Peer-to-Peer Conversation hunto cu Education USA pa studiantenan cu ta bayendo Merca. Ademá a traha hunto cu Universidad di Aruba pa por a brinda studiantenan di OGM un programa completo durante nan bishita na Washington DC na juni. E intencion ta pa brinda mas sesion di capacitacion. ■

2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

